

بِسْمِ اللَّهِ الرَّحْمَنِ الرَّحِيمِ

Khutba Jummah

HAZRAT MUHYI-UD-DIN AL-KHALIFATULLAH

Munir Ahmad Azim

10 Juin 2016 ~
(04 Ramadhan 1437 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et verset 187 de Surah Al-Baqara et li fine ensuite dire:

TAHAJJUD DANS RAMADHAN

وَإِذَا سَأَلَكَ عِبَادِي عَنِّي فَإِنِّي قَرِيبٌ ۖ أُجِيبُ دَعْوَةَ الدَّاعِ إِذَا دَعَانِ ۗ فَلْيَسْتَجِيبُوا لِي وَلْيُؤْمِنُوا بِي لَعَلَّهُمْ

يَرْشُدُونَ ﴿١٨٧﴾

Wa 'izaa sa-'alaka 'ibaadii 'annii fa-'innii Qariib: 'ujibu da'-watad-daa-'i 'izaa da 'aani fal-yastajibuu lii wal-yu'minuu bii la-'allahum yarshuduun.

Alhamdulillah Summa Alhamdulillah, par la grâce d'Allah mo pé contigne même Khutba de la semaine dernière. Mo ti lire versets 184-187 de Surah Al-Baqara, et kan ou lire dernier verset là (c'est-à-dire, verset 187), Allah (swt) dire :

« Kan Mo bane serviteur pose toi question lors Moi (dire zot) qui Mo près avec zot. Mo réponde zot l'appel kan zot appel Moi. Mais zot aussi besoin écoute Mo l'appel et gagne la foi en Moi, afin ki zot trouve bon chemin. » (Al-Baqara 2: 187).

Sa aussi c'est ene verset kot capave faire bane longues commentaires pour dire ki sa c'est ene période kot Allah (swt) vine encore pli près, kot Li disposer pour accepter bane duaahs. Mais li pas sans condition. Ena ene bane conditions ki attacher avec sa. Bizin écoute Allah, obéir Li et amène *Imaan* lors Li. C'est à ce moment là ki Allah (swt) disposé pour écoute ou bane duaahs.

Maintenant en connexion avec connaissance même, mo mette certains Hadiths de nous bien-aimé prophète Hazrat Muhammad (saw) ki ti ena plus grand connaissance de bane avantages, bénéfiques, et bénédictions de Ramadhan. Donc, en référence avec sa même et en connexion avec connaissances mo mette devant ou quelques Hadiths.

Dans Nasai, *Kitaab'-al-Sawm*, Hazrat Abdur-Rahman bin Auf (ra) rapporter ki Hazrat Muhammad (saw) fine mentionne le mois de Ramadhan et li fine dire ki sa le meilleur de tous bane les autres mois, et li fine dire ki celui ki dans le mois de Ramadhan, dans ene l'état de *Imaan*, et avec sincérité et pour gagne bane *Sawaab* (récompenses), li faire *Ibaadat*, bé sa dimoune là li vine complètement pure de tous so bane péchés. Li vine tellement pure couma dire li fine prend naissance à nouvo. Alor sak Ramadhan amène la bonne nouvelle d'ene nouvo naissance pour nous. Si nous passe le Ramadhan couma Allah (swt) fine dire et sous bane conditions ki Hazrat Muhammad (saw) fine mentionner, bé li couma dire sak l'année nous gagne ene nouveau naissance spirituelle et tous nous bane péchés avant effacer.

Dans ene lotte Hadith de Bukhari, dans *Kitaab'-al-Sawm*, sous le chapitre de supériorité de mois de Ramadhan, Hazrat Abu Huraira (ra) rapporter ki Hazrat Muhammad (saw) fine dire ki celui ki en accomplissant bane demandes de *Imaan* et avec l'intention de *Sawaab* (récompenses), li lever dans bane la nuites de Ramadhan et li faire le Namaz, bé tous so bane péchés pardonner.

Ena ene ti différence entre sa deux Hadiths là. Dans premier Hadith là ti mentionne *Ibaadat* en général, ki celui ki avec sincérité et *Imaan* li faire *Ibaadat* li couma dire li gagne ene nouvo naissance spirituelle. Ici, dans sa deuxième Hadith là fine mentionne spécialement le Namaz Tahajjud. Pé dire ki celui dans bane la nuites de Ramadhan li lever et faire *Ibaadat*, bé tous so bane péchés pardonner.

Donc, Ramadhan ena ene connexion spécial avec le Namaz Tahajjud ou soi nous bizin dire ki le Namaz Tahajjud ena ene lien spécial avec le Ramadhan quoique ki dans bane les autres mois aussi nous lire le Namaz Tahajjud. Et dans sa contexte là, tous bane ki garde *Roza*, bé ena ene chemin ouvert pour zot pour ki zot rentre dans le Tahajjud, parski li possible ki pour certains li vine bien difficile pour zot lever dans bane les autres jours. Mais puisque dans le mois de Ramadhan ena pour lever de toute façon, et ou ena pour lever pour ou bane manger matériel, bé ki faire ou pas profiter et ou pran aussi bane provisions spirituelles ? Alor ou bizin faire sa vine ene l'habitude, ene principe, et tous les temps exhorte bane zenfants aussi ki si zot lever pour le *Sehri*, zot faire deux *Rakaat Nafil* au moin. Et si zot fine arrive l'âge pour garde *Roza*, bé lerrlà définitivement bizin attirer zot l'attention pour le Tahajjud. Li pas correcte ki nek ou lever ou frotte frotte ou lizié et ou vine manger directement. Li alle contre l'esprit de Ramadhan.

Et pareil couma Hazrat Muhammad (saw) fine dire ki vrai *Barakat* (bénédiction) gagner avec le Namaz Tahajjud, mo espérer ki mo bane disciples ki trouve dans le Jamaat Ul Sahih Al Islam à

travers le monde entier, zot pour faire sa vine ene l'habitude, bane zenfants aussi et nous bane grands dimounes aussi et sa conseil là li pour tous bane musulmans à travers le monde aussi. Couma ene musulman capave lever et faire le *Sehri* sans ki li faire le Namaz Tahajjud ! Li impossible pou croire, mais ena li.

Donc, c'est sa mo conseil que ce soit bane grands et bane petits, ki zot lever avant zot faire le Namaz Tahajjud et si ena ene ti peu létemps, faire le *Telawat Quran* aussi et après alle faire *Sehri*, c'est-à-dire, kan ou analysé, ou la nuit alle nette dans bane *Ibaadat*, dormi moins et *Ibaadat* Allah beaucoup, kot ou pé dépense ou létemps de *Sehri* moïnse ki dans Namaz Tahajjud et *Telawat Quran*. Donc, c'est sa même tradition ki nous bizin inculquer et préserver dans sa l'époque actuel là aussi.

Dans Hadith Ahmad bin Hanbal, ena ene Hadith rapporter par Abou Saïd Al-Khudri (ra), kot li dire ki li fine tanne le Saint Prophète Hazrat Muhammad (saw) dire ki celui ki fine garde le *Roza* de Ramadhan, ki fine reconnaite et accompli bane demandes de Ramadhan et celui ki dans le mois de Ramadhan fine protège li de tous bane zaffaires ki li ti bizin reste protéger avec, c'est-à-dire, li fine protège li de toutes sortes de péchés, bé pour sa qualité *Rozadaar* (jeûneur) là, so bane *Roza* (carêmes) vine ene source de *Parda* pour tous so bane péchés avant. Ce ki veut dire ki, aparte le Tahajjud etc., ena bane les autres demandes de Ramadhan ki nous bizin accompli. En accomplissant sa bane demandes là ou bizin porte attention spéciale lor bane zaffaires ki Quran et Hadiths fine ordonne pour reste protéger avec, surtout pendant le mois de Ramadhan. Si ene *Rozadaar* (jeûneur) garde *Roza* en accomplissant tous sa bane demandes là, bé tous so bane péchés avant pardonner.

Dans Bukhari, *Kitaab'-al-Sawm*, Hazrat Abou Huraira (ra) rapporter ki Hazrat Muhammad (saw) fine dire ki kan Ramadhan vini, la porte de paradis ouvert et la porte de l'enfer fermer et bane Shaïtaan attacher. Concernant sa Hadith là, explication ki mo pou donner afin ki bane dimounes en générale capave dissipe tous zot malentendu ki capave causer par bane paroles de sa Hadith là, li pas veut dire du tout ki pendant le mois de Ramadhan pas pour ena personne au monde ki pour faire bane mauvais travail ki capave amène zot dans l'enfer. Non. Et li pas veut dire du tout aussi ki tous bane dimounes ki le Ramadhan pé traverser lor zot kan même zot bane *Momeneen* (croyants) ou bane *Kaafireen* (non-croyants), bé la porte de paradis ouvert pour zot tous.

La vérité c'est ki même si ene *Momin* (croyant), ene quelqu'un ki dire ki li fine amène *Imaan*, et dans le mois de Ramadhan li faire quelque chose contre bane demandes de sa mois là et délibérément li faire bane zaffaires ki alle à l'encontre de Ramadhan et pas seulement le Ramadhan mais à l'encontre de tous les jours, bé pour ene tel dimoune la porte de l'enfer pour encore plus grandement ouvert. En réalité, sa c'est ene bonne nouvelle pour bane tels croyants ki reste dans le cercle de l'obéissance de Hazrat Muhammad (saw) et dans le cercle de l'obéissance de Quran. Et sa c'est deux noms d'ene même chose, parski dans Quran aussi fine

mentionne obéissance Allah et So Rassool. Fine mentionne sa séparément pour faire ou conner ki si jamais ou pas trouve ene instruction directe dans le Quran mais ki fine mentionner par le Saint Prophète Muhammad (saw), alor mazine ki ou bizin obéir sa instruction là aussi, parski le Saint Prophète (saw) pas ti pé dire nannié sans l'autorisation d'Allah. Alor kan ou pou obéir li, bé couma dire ou pou obéir Allah même.

C'est dans sa l'esprit là ki sak fois mentionner dans Quran ki obéir Allah et So Rassool. C'est ene seul chose parski si ou obéir le prophète (saw) sans ki ou obéir Allah, bé obéissance là péna aucaine sense. Parski le Saint Prophète (saw) li même ti conne l'obéissance d'Allah et personne d'autres. Alor dans sa contexte là, la porte de paradis ouvert pour bane ki passe zot létemps dans l'obéissance d'Allah et de So Rassool. Li pas ouvert lor bane ki fine gagne sa mois béni là de Ramadhan là, mais ki fine tourne zot figure avec li et zot fine rejette tous so bane demandes. Lor sa qualité bane dimounes là ena plisse chance et li pli probable ki la porte de l'enfer vine encore pli grand ouvert pou zot au lieu ki li fermer. En réalité li ene bonne nouvelle pour le Oummaté Muhammadiyya ki vraiment observe l'obéissance d'Allah et So Rassool. C'est lor zot ki la porte de l'enfer fermer.

Maintenant la question ki poser, c'est pour ki, eski après le Ramadhan, la porte de l'enfer ouvert lor zot ? Eski zis dans Ramadhan ki li fermé ? Non. Li veut dire ki Ramadhan amène tellement de bane messages de *Nékis* (bon actions), tellement de message de biens pour zot et donne zot tellement l'enseignement de *Taqwa* (la piété, la crainte d'Allah) ki maintenant li pas possible même ki zot faire quique action ki amène zot dans l'enfer. Mais dans bane jours générales ena bane manque d'attention. Et façon ki l'attention pour attirer tellement vers le *Néki* (bon action) et évite le mal couma li été dans Ramadhan li pas pareil pour bane les autres mois. C'est pourquoi pour bane *Momineen* (croyants) le Ramadhan li le meilleur mois, le mois le plus protéger. Dans sa mois là péna même aucaine danger pour ene *Momin* (croyant), parski sak l'heure so l'attention attirer vers le fait ki li sorti de sa mois de Ramadhan là complètement pure de tout mauvais.

Alors c'est dans sa sense là ki bizin compran sa Hadith là ki c'est lor bane *Momineen* (croyants) ki arrive tous sa bane zaffaire là. C'est pour bane *Momineen* (croyants) ki la porte l'enfer fermé. La porte de paradis ouvert et bane Shaïtaan attaché. Sa c'est ene zaffaire très important ki nous bizin garde en vue.

Ki Allah (swt) aide sakaine parmi nous pour compran bien l'importance de Ramadhan dans tous so l'aspé et nous contigner profite le mois béni, le mois de Ramadhan dans so intégralité. *Insha-Allah, Ameen.*